



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Rabu, 27 April 2022	
1.	-Siasat dakwaan campur tangan politik -Penternak jamin bekalan ayam masih mencukupi menjelang Aidilfitri -Peniaga merungut bekalan ayam dicatu
2	Wujudkan lembaga unggas
3	Buktikan cara sembelihan dalam rakaman video tak salah
4	RISDA tingkat pengeluaran daging halal tempatan

DISEDIAKAN OLEH:

**SEKSYEN KOMUNIKASI KORPORAT
JABATAN PERKHIDMATAN VETERINAR MALAYSIA**

Siasat dakwaan campur tangan politik

Hasil laporan isu kartel ayam akan dikemukakan MyCCC

Oleh SYAMILAH ZULKIFLI

KUANTAN

Kementerian Perdagangan Dalam Negeri dan Hal Ehwal Pengguna (KPDNHEP) sedang menyiasat dakwaan wujudnya campur tangan politik dalam melindungi kartel ayam hingga menyebabkan berlakunya kenaikan harga bahan mentah itu.

Menterinya, Datuk Seri Alexander Nanta Linggi berkata, Suruhanjaya Persaingan Malaysia (MyCC) bersama agensi terlibat sudah menjalankan siasatan sejak beberapa bulan lalu dan perlu diteliti dengan lebih terperinci.

"Buat masa ini yang dikata-



Alexander menunjukkan ayam yang dijual di sebuah pasar raya di Nilai.

kan penglibatan ahli politik itu kita hanya baca dalam surat khabar, tapi yang pentingnya MyCC sedang jalankan siasatan. Ini bukan perkara mudah dan tak boleh terlalu cepat mengatakan ada kartel.

"Tapi saya tak nafikan dan tak

juga mengesahkan ada, elok tunggu laporan MyCC," katanya pada sidang media selepas majlis Pelancaran Program Jualan Malaysia Rancak Aidilfitri dan Walkabout Sempena Penguatkuasaan Skim Harga Maksimum Musim Perayaan

Aidilfitri 2022 di sebuah pasar raya di sini pada Selasa.

Beliau berkata demikian mengulas laporan media yang mendakwa campur tangan politik sejak sekian lama dalam isu membabitkan dominasi kartel terhadap industri penternakan ayam

di seluruh negara menyebabkan pihak terbabit terus bermaharajalela.

Ujar Alexander, KPDNHEP bersama agensi lain memberi kerjasama penuh bagi membantu siasatan.

"KPDNHEP sememangnya ada peranan dalam itu kerana kita Kementerian yang mengawal harga barang. Kita bersama agensi lain akan lakukan yang sepatutnya," katanya.

Selain itu katanya, KPDNHEP tidak menerima sebarang aduan bekalan ayam tidak mencukupi menjelang Aidilfitri ini namun pemantauan sentiasa dilakukan.

Bercakap mengenai program skim kawalan harga barang yang hanya pada musim perayaan, Alexander berkata, kerajaan bukan saja melindungi pengguna, tetapi juga peniaga.

"Kita bukanlah memihak kepada sesiapa, tapi perlulah adil kepada semua. Kalau peniaga terjejas akan timbulkan masalah lain pula," katanya.

Penternak jamin bekalan ayam masih mencukupi menjelang Aidilfitri

SHAH ALAM - Bekalan ayam ketika ini masih lagi mencukupi untuk permintaan tempatan, terutama menjelang perayaan Hari Raya Aidilfitri nanti.

Presiden Persekutuan Persatuan Penternak-penternak Malaysia (FLFAM), Tan Chee Hee berkata, sekiranya terdapat isu kekurangan bekalan, ia mungkin kes terpencil sahaja.

Ujarnya, kenaikan harga ayam secara mendadak tidak akan berlaku seawaktu musim perayaan Aidilfitri ini kerana ia dikawal oleh kerajaan.

Beliau menambah, setakat ini pihaknya tidak menerima sebarang aduan berhubung dakwaan harga ayam yang melampau di Kelantan.

"Jika perkara ini berlaku, Kementerian Perdagangan Dalam Negeri dan Hal Ehwal Pengguna (KPDNHEP) sudah tentu akan membuat siasatan tersebut," katanya.

Ditanya mengenai punca kenaikan harga ayam, beliau menjelaskan, ia berpunca daripada

Jika perkara ini berlaku, Kementerian Perdagangan Dalam Negeri dan Hal Ehwal Pengguna (KPDNHEP) sudah tentu akan membuat siasatan tersebut."

kenaikan harga bahan mentah utama makanan ternakan seperti jagung bijirin dan kacang soya.



TAN CHEE HEE

Katanya, kenaikan harga bahan mentah tersebut semakin meningkat sejak perang Ukraine pada 24 Februari lalu.

"Misalnya harga jagung bijirin ialah RM1,900 satu tan metrik, berbanding sebelum perang, RM1,500 sahaja.

"Manakala harga kacang soya pula melonjak ke RM2,950 satu tan metrik, berbanding RM2,200, sebelum ini," katanya.

Peniaga merungut bekalan ayam dicatu

KUANTAN - Peniaga ayam segar di daerah ini mengeluh apabila bekalan ayam di pasaran terpaksa dicatu atas alasan pembekal bimbang bahan mentah itu tidak mencukupi menjelang musim perayaan minggu depan.

Seorang peniaga Azizah Omar, 34, mengakui berdepan dengan kekurangan bekalan ayam mentah sejak Ahad lalu sehingga tidak mampu menampung pembelian pengguna biarpun dalam keadaan terpaksa mematuhi harga siling ayam RM8.90 sekilogram.

"Kalau sebelum ini saya boleh menjual 300 hingga 400 ekor ayam setiap hari, tapi sejak tiga hari lalu saya hanya mendapat tempahan yang biasa diterima.

"Bila saya dan peniaga lain bertanya kenapa bekalan ayam dicatu, pembekal memaklumkan bimbang bekalan bahan mentah itu tidak mencukupi pada Aidilfitri ini.

"Jadi, pembekal terpaksa menahkodkan tempahan daripada peruncit kerana di peringkat pengeluaran sudah menetapkan kuota tertentu," katanya ketika ditemui di Pasar Besar Kuantan.

Dia yang lebih 16 tahun menjadi peniaga ayam berkata, ke-



Razali memotong ayam yang ditempah pelanggan di gerai miliknya.

adaan lebih menyedihkan kerana lebih kurang jam 10 pagi semua ayam jualan telah habis dijual berbanding sebelum ini kira-kira jam 12 tengah hari.

"Namun kerana bekalan ayam yang kita dapat kurang dari jumlah sebelum ini, jadi pengguna terpaksa pulang dengan hampa," katanya.

Seorang lagi peniaga ayam, Razali Elyas, 60, juga mengalami nasib sama mengakui terkejut dengan masalah kekurangan bekalan ayam sehingga menjejaskan hasil perniagaannya.

"Setakat ini, kami peniaga

ayam di Kuantan menjual ayam pada harga kawalan iaitu RM8.90 sekilogram, manakala ayam yang siap dipotong pula sebanyak RM9.60 sekilogram," katanya.

Sementara itu, seorang peniaga, Harun Mat, 48, berkata, isu bekalan ayam yang berkurangan telah memaksanya mencari lebih ramai pembekal bagi memenuhi permintaan.

Ujar Harun, kebiasaannya setiap peniaga akan mengambil bekalan daripada pembekal yang sama, namun keadaan tersebut berubah selepas berulangi kali mengalami masalah bekalan.

Cadangan selesai isu kartel, stabilkan harga ayam

Wujudkan lembaga unggas

Oleh FAHMI FAIZ

fahmi.faiz@mediamula.com.my

PETALING JAYA: Kerajaan didekahkan mewujudkan sebuah lembaga khas bagi mengawal dan menyelia industri unggas di negara ini jika mahu isu penguasaan kartel dalam perusahaan terse-

but diselesaikan.

Penubuhan badan dengan melibatkan pelbagai kementerian dalam sektor makanan negara itu penting supaya langkah-langkah yang diambil kerajaan bagi menstabilkan harga ayam dapat dilaksanakan dengan lebih berkesan.

Kerajaan sebelum ini telah menyuntik subsidi berjumlah RM528.52 juta untuk menstabilkan harga ayam, namun usaha tersebut masih gagal menurunkan harga di pasaran, sebaliknya penternak dan pembekal terus bermain dengan isu lain berkaitan kos ternakan yang di-

katakan meningkat.

Bercakap kepada *Utusan Malaysia*, Pengarah Nafas Food Processing and Marketing Sdn. Bhd., Shafiqurrahman Shamsuddin berkata, langkah mewujudkan sebuah lembaga perlu supaya industri tersebut dapat dipantau secara berintegrasi.

"Ketidadaan sebarang lembaga bagi menyelia industri bernilai RM10 bilion setahun itu mengakibatkan kerajaan terpaksa berdepan masalah kenaikan harga yang tidak selesai," katanya di sini, semalam.

Bersambung di muka 4



ALEXANDER Nanta Linggi melihat harga ayam yang ditawarkan ketika program walkabout Pelaksanaan Skim Harga Maksimum Musim Perayaan (SHMMP) Hari Raya Puasa 2022 di AEON Mall, Nilai, semalam. - UTUSAN/ MOHD. SHAHJEHAN MAAMIN

Wujudkan lembaga unggas

Dari muka 1

Akhbar ini kelmarin melaporkan tentang wujudnya kartel ayam yang bermaharajalela mengawal industri itu lebih-lebih lagi dengan adanya campur tangan politik.

Shafiqurrahman berkata, ketidadaan satu badan khas untuk mengawal selia industri ternakan menyebabkan beberapa polisi yang diambil kerajaan masih tidak berjaya mengawal harga ternakan di pasaran.

"Sejak Januari hingga Mac lalu, kerajaan melaksanakan tiga polisi untuk kawal harga ayam. Pertama, pada Januari kerajaan keluarkan kelulusan import (AP) kepada 32 syarikat untuk bawa masuk ayam sejuk beku namun malangnya ia tak dapat turunkan harga ayam.

"Pada Februari kerajaan keluarkan pula empat AP import kepada empat pasar raya besar, dan menyalurkan subsidi 60 sen sekilo kepada penternak. Sekali lagi, ia turut menemui kegagalan untuk menurunkan harga ayam.

Katanya, setiap hari negara memerlukan 2.2 juta ekor ayam dan ketidadaan lembaga khusus mengakibatkan beberapa syarikat besar 'berkuasa' menentukan jumlah anak ayam yang mahu dikeluarkan tanpa dipantau dan diaudit kerajaan.

"Oleh sebab tiada lembaga yang kawal selia industri, maka syarikat-syarikat pengeluar anak ayam berkuasa menentukan berapa anak ayam yang mahu dikeluarkan. Jika terlebih, mereka akan bakar anak ayam supaya kurang bekalan dan harga sentiasa kompetitif

bagi mereka.

Menurutnya, oleh kerana tiada sebarang sistem rekod untuk kerajaan menyemak pengeluaran anak ayam baka, hal itu mendorong berlakunya keputusan bekalan yang tidak dapat diselia secara berpusat oleh kerajaan.

Jika diwujudkan, lembaga itu juga akan turut memantau ternakan itik dan burung puyuh.

Sementara itu, Pengerusi Koperasi Kelab Generasi Transformasi Ruminan Malaysia (GTR) Nordin Mat berkata, kewujudan lembaga khas dapat menghapuskan amalan 'kroni' dalam kalangan penternak dan peniaga.

"Wajib diadakan lembaga ini untuk memantau kartel yang suka hati meletak harga anak ayam," katanya.

Dalam pada itu, Pertubuhan Gerak Tani Malaysia meminta kerajaan tidak tunduk kepada kartel sehingga menyebabkan harga ayam dinaikkan begitu sahaja tanpa berdepan dengan sebarang tindakan.

Pengerusinya, Datuk Mazlan Aliman menyifatkan, kartel t memonopoli pasaran kerana tiada pelan khusus dalam memastikan tidak ada pihak yang boleh menguasai pasaran sehingga menjejaskan harga dan pesaing lain.

"Dasar keselamatan makanan negara telah sedia ada dan dipinda dari masa ke semasa namun mekanismenya begitu lemah," katanya.

Namun, katanya, penguasaan kartel boleh diatasi dengan memperluaskan peranan syarikat milik kerajaan (GLC) dan sebuah lembaga khas.

"FGV, Pertubuhan Peladang

Kebangsaan (Nafas), Petronas dan lain-lain yang mempunyai modal besar mesti terlibat membina kilang makanan ternakan bagi mengelakkan kebergantungan import," katanya.

Pada masa sama, beliau juga meminta peranan Jabatan Perkhidmatan Veterinar dikaji semula kerana dianggap tidak mampu menangani industri ayam dan ruminan yang saiznya begitu besar.

"Struktur jabatan harus diperkasa kepada agensi yang besar dan peranan atau keber-tanggungjawaban yang selaras dengan kepentingan industri ayam dan ruminan," katanya.

Sementara itu di SEREMBAN, Menteri Perdagangan Dalam Negeri dan Hal Ehwal Pengguna (KPDNHEP), Datuk Seri Alexander Nanta Linggi berkata, Suruhanjaya Persaingan Malaysia (MyCC) sedang menjalankan siasatan berhubung dakwaan campur tangan politik dalam isu dominasi kartel terhadap industri ternakan ayam.

Menurutnya, siasatan yang dimulakan sejak beberapa bulan lalu itu turut melibatkan Polis Diraja Malaysia (PDRM).

"Ini bukan perkara mudah untuk disiasat, mesti diteliti secara terperinci barulah kita boleh pastikan.

"Tidak boleh terlalu cepat mengatakan ada kartel, mungkin ada, saya tidak menafikannya tetapi lebih elok, kita tunggu laporan MyCC nanti," katanya kepada pemberita selepas program walkabout dan Pelancaran Program Jualan Malaysia Rancak Aidilfitri di AEON Mall, Nilai semalam.

Buktikan cara sembelihan dalam rakaman video tak salah

Oleh MAISARAH SHEIKH RAHIM
maisarah.rahim@mediamula.com.my

PUTRAJAYA: Jabatan Kemajuan Islam Malaysia (Jakim) digesa merujuk kepada pendedahan rakaman video pelanggaran protokol halal sebuah rumah penyembelihan di Australia sebelum membuat pengesahan.


Bercakap kepada *Utusan Malaysia*, sumber berkata, tindakan Jakim bergantung kepada jaminan badan pensijilan halal di Australia, Supreme Islamic Council of Halal Meat in Australian Inc. (SICHMA) bahawa tidak berlaku sebarang salah laku, amat meragukan.

Katanya, ini termasuk memberi kepercayaan penuh kepada Atase Halal yang dilantik Jakim berpangkalan di Suruhanjaya Tinggi Malaysia di Canberra, sesuatu yang mencurigakan.

Beliau mendakwa, tarikh dan waktu pemantauan atau audit yang akan dilakukan dimaklumkan seawal dua minggu sebelum pemantauan itu dilakukan sekali gus memudahkan mana-mana syarikat untuk membuat persediaan terbaik sebelum pemeriksaan.

"Kita mengalu-alukan maklum balas Jakim yang akhirnya menjawab kebimbangan masyarakat Islam berhubung isu ini selepas dibangkitkan sejak bulan lalu.

"Namun, siasatan Jakim hanya bergantung kepada jaminan SICHMA iaitu badan pensi-



TANGKAP layar menunjukkan beberapa ekor kambing dipercayai dilemaskan dalam takungan darah di sebuah pusat penyembelihan.

jilan halal (FHCB) yang diiktiraf terhadap rumah sembelihan itu. Jakim bagaimanapun tidak menyatakan bahawa amalan sembelihan yang dirujuk menerusi bukti video itu adalah tidak benar atau sebaliknya," katanya di sini semalam.

Jakim sebelum ini mengesahkan Thomas Foods Industries di Australia mematuhi keperluan standard penyembelihan halal Malaysia dan peraturan ke atas haiwan yang ditetapkan pihak berkua-

sa Australia.

Ketua Pengarah Jakim, Datuk Hakimah Mohd Yusoff berkata, Pegawai Atase Halal Jakim di Canberra yang menjalankan audit berkala ke atas Thomas Foods Industries pada 2 Mac lalu mendapati ia mematuhi peraturan ditetapkan.

Dalam pada itu, sumber terbabit berkata, rumah penyembelihan yang diiktiraf halal untuk eksport ke Malaysia perlu disahkan oleh Jakim, Jabatan Perkhidmatan Veterinar serta

FHCB Australia, selain Atase Halal Jakim yang berpangkalan di Australia juga melakukan audit pemantauan berkala.

"Perkara itu tidak ada isu, namun, timbul tanda tanya apabila pelaksanaan audit terhadap rumah penyembelihan dimaklumkan lebih awal.

"Sudah tentu atas kepentingan komersial, rumah penyembelihan membuat persediaan untuk audit dan memastikan juruaudit dapat menilai apa yang sepatutnya," katanya.

Beliau pada masa sama menegaskan, segala bukti adalah daripada sumber sah yang pernah bekerja di rumah penyembelihan itu yang melihat apa yang berlaku hampir setiap hari.

Untuk itu, beliau mempersoalkan adakah Jakim menyiasat bukti rakaman video itu dan meyakini bahawa kejadian salah laku itu tidak berlaku dan dakwaan itu adalah palsu semata-mata.

"Mengapa Jakim tidak memulakan siasatan terhadap dakwaan ini, termasuk menemui bual kakitangan penyembelihan Islam semasa dan terdahulu. Lagipun Jakim ada wakil di Australia.

"Jakim mengiktiraf tujuh FHCB di Australia, tetapi mengapa Jakim secara terbuka hanya mempromosikan atau berkongsi profil hubungan dengan SICHMA sedangkan ini tidak berlaku dengan FHCB yang lain," soalnya.

RISDA tingkat pengeluaran daging halal tempatan

Integrasi fidlot sasar tambah kapasiti kepada 10,000 ekor setahun

Oleh Mahani Ishak
mahani@bh.com.my

Kuala Lumpur: Pihak Berkuasa Kemajuan Pekebun Kecil Perusahaan Getah (RISDA) menyasarkan untuk mempertingkatkan kapasiti keluaran fidlot kepada

10,000 ekor setahun.

Pengerusi RISDA, Datuk Seri Mohd Salim Mohd Sharif, berkata ketika ini kapasiti fidlot adalah sebanyak 6,000 ekor.

"Integrasi fidlot yang dilaksanakan RISDA melalui anak syarikat RISDA Livestock Sdn Bhd (RLSB) kini sedang membantu ke arah meningkatkan keluaran daging tempatan berstatus halal selaras dasar keselamatan makanan negara.

"Menerusi hab pemprosesan daging di Semenyih, Selangor, RLSB mempunyai kemampuan pemasaran yang unik melalui penawaran jualan bahagian daging korban siap diproses dan dibungkus secara halal dan suci, terus kepada pelanggan.

Mohd Salim (tiga dari kanan) bersama (dari kiri) Sopian, Ketua Pegawai Eksekutif MLT, Muhammad Raziz Rahim; Ali, Pengerusi KOPONAS, Mohd Azham Abd Jabar dan Pengarah PISB, Ustaz Uwaiz Al Qorny Ab Latiff selepas majlis memeterai perjanjian Ejen Jualan Qurban RLSB di Kuala Lumpur, semalam. (Foto Fariz Iswadi Ismail/BH)

"Bagi tahun ini, RLSB bersama tiga syarikat Bumiputera sebagai ejen jualan korban menyasarkan 1,000 lembu untuk memenuhi permintaan ibadat korban," katanya.

Beliau berkata demikian pada sidang media majlis memeterai perjanjian Ejen Jualan Qurban RLSB, di ibu pejabat RISDA, semalam.

Yang turut hadir, Timbalan Ketua Pengarah (Pembangunan) RISDA, Ali Sabuddin Abdul Samad; Timbalan Ketua Pengarah (Pengurusan dan Korporat) RISDA, Sopian Abu Bakar dan Ketua Pegawai Eksekutif RISDA Holdings, Zainal Azni Zulkifli.

Ejen jualan membabitkan tiga syarikat Bumiputera ialah Kope-

rasi Pos Nasional Berhad (KOPONAS), Protaz International Sdn Bhd (PISB) dan Mamu Livestock Trading (MLT).

Mohd Salim berkata, orang ramai yang mahu menyertai korban melalui RLSB boleh membuat pesanan melalui ejen jualan yang dilantik.

"Pihak kami akan menguruskan pemilihan, penyembelihan dan pemprosesan lembu untuk ibadah korban. Daging itu akan dipek dan divakum sebelum diserahkan kepada peserta dalam bentuk karton.

"Ini juga adalah kali pertama, peserta korban boleh mewakilkan RLSB untuk mengedarkan daging korban kepada asnaf me-

merlukan. Semua proses itu dilaksanakan dengan mementingkan aspek kesucian dan kebersihan di samping mematuhi langkah keselamatan dan prosedur operasi standard (SOP) COVID-19," katanya.

Mohd Salim berkata, RLSB menyasarkan peningkatan pengeluaran daging negara daripada kadar tujuh peratus kepada 30 peratus dalam tempoh lapan tahun ini.

"Sekiranya pengeluaran daging tempatan cukup untuk memenuhi bekalan kepada pengguna, sudah pasti mengurangkan kebergantungan kepada daging luar dan agensi di bawah RISDA ini membantu menjadi pengeluaran utama," katanya.

